

Bidang rekreasi dan ekopelancongan bina kerjaya hebat



Oleh Nas Norziela Nasbah
nasnorziela@mediaprima.com.my

Bergelar pakar dalam bidang rekreasi bukan saja bergantung pada kemahiran, tetapi seseorang itu perlu mencari peluang dalam bidang keusahawanan bagi membolehkan mereka meneroka pasaran industri pelancongan.

Seiring usaha melahirkan graduan dalam bidang rekreasi dan ekopelancongan, Fakulti Perhutanan Universiti Putra Malaysia (UPM) bakal meraikan 50 graduan sulung bagi program Ijazah Sarjana Muda hujung tahun 2014.

Ketua Jabatan Rekreasi dan Ekopelancongan, Prof Madya Dr Azlizam Aziz, berkata program rekreasi dan ekopelancongan menawarkan pengajian bertaraf profesional.

Beliau berkata, ia bertujuan melahirkan pakar

rekreasi yang bukan saji mahir kemahiran fizikal malah dapat menterjemahkan aktiviti kepada usaha menjana pendapatan.

Katanya, program pengajian memberi penekanan kepada tiga fungsi utama dalam diri mahasiswa untuk menjadi seorang pengurus sumber, pemimpin rekreatif dan keusahawan.

Tiga fungsi itu memberi kelebihan untuk melahirkan graduan berkualiti daripada fizikal selain kemahiran

memajukan diri melalui kemahiran keusahawanan," katanya ketika ditemui di Pusat Pendidikan Perhutanan Sultan Idris Shah (SISFEC), Hutan Simpan Ayer Hitam, Puchong, Selangor, baru-baru ini.

Dr Azlizam berkata, program Ijazah Sarjana Muda Rekreasi dan Ekopelancongan, masa yang diperlukan untuk menghabiskan pengajian sekitar empat tahun termasuk enam bulan latihan amali di agensi kerajaan,

bukan kerajaan termasuk hotel, pusat peranginan dan agensi pelancongan.

Apa yang menarik lagi, beliau berkata, beberapa pelajar akan dihantar menjalani latihan amali ke luar negara sekali gus menjadi duta kepada fakulti, UPM dan negara.

Usaha itu katanya, dapat mempromosikan produk pelancongan negara sekali gus meningkatkan ekonomi sedia ada.

"Melalui duta kecil ke

luar negara ini dapat memberi situasi menang-menang (*win-win situation*) antara pihak kita dengan agensi antarabangsa.

"Ilmu dan pengalaman pelajar ketika berada di luar negara mungkin dapat dikongsikan bersama-sama rakan dan pensyarah di sini," katanya.

Selain Ijazah Sarjana Muda, Dr Azlizam berkata, program itu turut menyediakan peringkat Sarjana dan Ijazah Doktor Falsafah (PhD) yang tidak memerlukan tesis tetapi lebih tertumpu pada kerja khusus.

"Kita mahu melahirkan graduan berdaya saing yang bukan saji berkemahiran dalam bidang rekreatif malah bertindak sebagai pengurus sumber, pemimpin rekreatif dan pengurus risiko yang konsisten," katanya.

INFO

Nasihat Dr Azlizam kepada lepasan sekolah*

- * Kumpulkan maklumat sebanyak mungkin mengenai bidang pengajian yang diminati.
- * Dapatkan nasihat atau panduan yang baik daripada guru, kaunselor atau kaunselor kerja mengenai bidang yang ingin dicebur.
- * Hubungi terus atau hantarkan e-mel ke pusat pengajian untuk mengetahui lebih lanjut.
- * Melawat kampus.
- * Berfikiran terbuka.



“PROGRAM REKREASI DAN EKOPELANCONGAN BERTUJUAN MELAHIRKAN PAKAR REKREASI YANG BUKAN SAJA MAHIR KEMAHIRAN FIZIKAL MALAH DAPAT MENTERJEMAHKAN AKTIVITI KEPADA USAHA MENJANA PENDAPATAN”

Prof Madya Dr Azlizam Aziz

Dr Azlizam (kiri) berbincang bersama-sama Dr Manohar Mariapan (kanan) mengenai jenis pokok yang terdapat di Hutan Simpan Ayer Hitam Puchong.